

Bigbala Fladwoda

(6:1-9:17)

Storimen: Wal bigmob pipul bin jidanbat langa ebri kantri na, en ola pipul bin abumbat bigismob biginini.

²Bambai na najakain spirit bin lukinatbat ol detlot purdibala gel, en detlot spirit bin go en pikimat wujan gel deibin wandim, en deibin merrit langa detlot gel.

³Afta na YAWEI det trubala God bin tok langa imselp,

God: “Ai kaan kipgon larrambat ola pipul jidanbat laibala longtaim, dumaji olabat oni pipul. Wal oni 120 yiya dei garra gajimap. Afta tharran, binij.”

Storimen: ⁴Afta na detlot gel hubin merrit langa detlot spirit bin abum biginini olabat, en deibin gulum olabat Nefalim pipul, en afta wen olabat mami bin dai, detlot Nefalim pipul bin kipgon jidanbat langa olabat mami kantri, en deibin ol brabli strongbala pipul, en deibin jidan bigneim.^a

⁵Bambai na YAWEI bin luk ebrijing weya ola pipul bin dumbat bin brabli nogudwan, en God bin luk ebrijing weya deibin jingabat olataim bin brabli nogudwan du.

⁶⁻⁷Wal wen God bin luk ola pipul bin nogudbala lagijat, imbin jidan brabli nogudbinji, en imbin tok langa imselp,

God: “Wotfo aibin meigim dislot pipul olabat? Ai garra binijimap olabat langa ebri kantri. Ai garra binijimap ola pipul en ola enimul du. Wotfo aibin meigim olabat?”

Storimen: ⁸Wal oni wanbala men deya bin meigim YAWEI gudbinji. Det men bin neim Nowa.^b ⁹⁻¹⁰Imbin abum thribala san neim Shem, Hem en Jeifeth, en imbin gudbala men. Nobodi bin oldei faindim eni rong langa im, en imbin oldei bulurum God brabliwei.^c

¹¹⁻¹²Wal det taim na ol detlot pipul langa ebri kantri bin ol nogudbala, en dei nomo bin stap faidabat oldei.

Wal God bin lukinat olabat, en imbin luk ol detlot ting weya deibin oldei dumbat bin brabli nogud, dumaji olabat bin meigim ola kantri ebriweya nogudwan. ¹³Afta na God bin tok langa Nowa,

God: “Ai garra binijimap ola pipul, dumaji olabat oldei dumbat nogudbala ting. Ebri kantri jidan oni garram detlot nogudbala ting. Wal ai garra binijimap olabat holot na. ¹⁴Bat yu garra meigim bout blanga yuselp. Yu garra meigim det bout garram gudwan timba, en yu garra peindim det bout garram bitjaman insaid en atsaid. ¹⁵Lagijat na yu garra meigim det bout. 133 mita longwei, 22 mita kroswei en 13 mita streit apendan, ¹⁶en yu garra meigim thribala rum langa det bout. Yu garra meigim lodanwan rum, midulwan rum en ontopwan rum, en yu garra pudum ruf langa det bout du, en yu garra libum gep olaran blanga windo, en yu garra meigim wanbala bigwan dowan langa said. ¹⁷Yu garra meigim det bout lagijat, dumaji ai garra jandim bigbala fladwoda langa ebri kantri, en det fladwoda garra draundim ebrijing, en ai garra binijimap ebrijing weya jidan laibala. Ebribodi garra dai.

¹⁸“Oni langa yu na ai garra meigim strongwan pramis. Yu garra gowin langa det bout garram yu waif en garram det thribala san blanga yu en garram olabat thribala waif. ¹⁹En yu garra gajim dubaladubala difrinkain enimul olabat. Boiwan en gelwan yu garra gajim, en yu garra pudum olabat langa det bout blanga bridabat afta wen det fladwoda garra godan. ²⁰Yu garra gajim dubaladubala olkain bard en olkain enimul. Nomeda olabat bigwan o lilwan, bat stil yu garra gajim olabat, en yu garra pudum olabat langa det bout weya olabat kaan draun. ²¹En yu garra gajim daga du blanga yu en yu femili en blanga ola enimul.”

Storimen: ²²Wal Nowa bin duwit langa God, en imbin dum ebrijing weya God bin dalim im blanga dum. ^{7:1}Afta na YAWEI det trubala God bin tok langa Nowa,

God: “Aibin luk ebribodi langa ola kantri oldei dumbat nogudbala ting, en aibin faindim oni yu na dumbat gudbala ting. Wal yu gowin insaid langa det bout na garram yu femili olabat, dumaji ai

garra seibum yumob. ²En blanga ol detlot difrinkain enimul weya yu yusum langa serramoni, yu garra deigim sebenbala boiwan en sebenbala gelwan garram yu. En blanga ol detlot difrinkain enimul weya yu nomo yusum langa serramoni, yu garra deigim dubala garram yu. Boiwan en gelwan yu garra deigim. ³En blanga ola difrinkain bard, yu garra deigim sebenbala boiwan en sebenbala gelwan garram yu. Yu garra deigim ol detlot enimul en ol detlot bard langa det bout blanga bridabat afta wen det fladwoda garra godan. ⁴Oni wanwik na en ai garra jandim rein langa ola kantri, en det rein garra buldan deitaim en naitaim nomo stap. Det rein garra buldan 40 dei gulijap 6 wik, dumaji ai garra draundim ebrijing weya aibin meigim, en ola enimul en ola pipul garra ol binij.”

Storimen: ⁵Wal Nowa bin lisin langa det wed weya YAWEI bin dalim im, en imbin duwit langa im. ⁶En imbin brabli olmen wen det fladwoda bin kaman. Imbin 600 yiya ol.

⁷Wal Nowa en im waif en detlot thribala san blanga dubala en detlot thribala waif blanga olabat bin ol gowin langa det bout, dumaji imbin gulijap taim blanga det fladwoda,^a ⁸⁻⁹en Nowa bin duwit langa God, en imbin deigim ol detlot enimul langa det bout. Imbin deigim ol detlot enimul weya deibin yusum langa serramoni en ol detlot enimul weya dei nomo bin yusum langa serramoni, en imbin deigim ol detlot bard du. Dubaladubala boiwan en gelwan imbin deigim langa det bout.

¹⁰⁻¹³Langa det seim dei Nowa en im waif en detlot thribala san blanga im neim Shem, Hem en Jeifeth en detlot thribala waif blanga olabat bin ol gowin insaid langa det bout garram ol detlot difrinkain enimul en bard olabat.^b ¹⁴⁻¹⁵Ola wailwan enimul en ola kwaitwan enimul en ola buligimob en ol detlot lisid en sneik en ola bard en olkainaba insek, ol detlot na bin kaman langa Nowa, boiwan en gelwan, ¹⁶en deibin ol gowin insaid langa det bout jis laik weya God bin dalim Nowa. En det seim dei YAWEI det trubala God bin jadimap det dowa blanga det bout.

Wal afta wan wik na det fladwoda bin gidap. Langa det namba 3 dei langa det sekan wik blanga det sekan manth det skai bin opinap, en woda bin kamat detmatj, en rein bin buldan deitaim en

naitaim nomo stap 40 dei gulijap 6 wik.

¹⁷Wal det fladwoda bin gidap na, en det bout bin flout ontop langa det woda, ¹⁸en det woda bin kipgon gidap mowa en mowa blanga 40 dei, en imbin lidimap det bout mowa haibala. ¹⁹Ebriweya det woda bin gaburumap ola reinjis kantri. ²⁰Nomo enijing bin kamat na, en det woda bin jidan 7 mita dip ontop langa ola haibala hil.

²¹Wal ola enimul en ola bard en ola lisid en sneik en badaflai en grashopa en ola pipul langa ebri kantri olabat holot bin ol draun.

²²Ebrijing weya bin jidan laibala bifo holot bin ol dai. ²³⁻²⁴Langa ebri kantri ola pipul en ola enimul bin binij. Nomo enijing bin jidan laibala. Najing na. Holot bin ded. Oni Nowa en detlot langa det bout bin jidan laibala.

¹⁻²Afta na God bin jadimap det skai, en imbin klosimap ola bigbala springwoda langa graun, en det rein bin stap buldanbat na. Bat det fladwoda bin stil jidan ontop langa ola kantri, en det woda bin gaburumap ola graun ebriweya longtaim.

Wal God nomo bin fokedabat Nowa. Imbin stil jinggabat im en im femili olabat en ola enimul langa det bout, en imbin jandim win ebriweya langa det kantri blanga draiyimap ola woda. ³Slobala det fladwoda bin godan blanga 5 mants. 150 dei det fladwoda bin godan, ⁴en langa det namba 3 dei blanga det sekan wik langa det namba 7 manth det bout bin jidan ontop langa wan hil gulum Eraret. ⁵En det fladwoda bin stil kipgon godan slobala raidap langa det namba 10 manth, en langa det feswan dei langa det namba 10 manth ola hil bin stat kamat na.

⁶Wal det bout bin jidan deya ontop langa det hil 40 dei gulijap 6 wik, en afta Nowa bin opinim det windo blanga det bout, ⁷en imbin larrango wanbala kro. Det kro bin flairanbat olaran raidap det woda bin godan brabli.

⁸Wal afta wen Nowa bin larrango det kro, imbin larrango wanbala pijin blanga faindat if det woda bin godan, ⁹en det pijin bin trai. Bat im nomo bin faindim pleis blanga meigim nes, dumaji woda bin stil leidan ebriweya ontop langa graun, en det pijin bin lafta flaibek langa det bout, en Nowa bin gajim im en pudum im insaid langa det bout.

¹⁰Afta na wanwiktaim Nowa bin larramgo det pijin brom det bout igin, ¹¹en wen det pijin bin kambek sangodantaim, imbin abum grinwan lif langa im maus brom det tri gulum olibtri, en Nowa bin sabi na det woda bin godan en ola graun bin gulijap drai.

¹²Wal Nowa bin weit wanmo wik, en afta imbin larramgo det pijin brom det bout igin, en distaim det pijin bin flaiwei, en im nomo bin kambek.

¹³Wal Nowa bin brabli olmen na 601 yiya ol, en langa det feswan dei langa det feswan manth ola woda bin ol drai, en Nowa bin opinim det dowan blanga det bout, en imbin luk nomo woda bin deya. Det woda bin ol gowei. ¹⁴Bat det graun bin stil jidan sofwan, en Nowa en im femili bin lafta jidan insaid langa det bout 2 mants. Afta na langa det namba 6 dei blanga det namba 3 wik langa det sekan manth, ola graun langa ebri kantri bin jidan brabli draiwan.

¹⁵Wal God bin dalim Nowa, ¹⁶

God: Yu kamat atsaid brom det bout na garram yu waif en detlot thribala san blanga yu en olabat waif, ¹⁷en yu bringimat ol detlot bard en enimul olabat atsaid brom det bout du, en yu larramgo olabat wulijim dei garra bridabat ebriweya langa ebri kantri.”

Storimen ¹⁸Wal wen God bin tok lagijat, Nowa en im femili olabat bin kamat atsaid brom det bout, ¹⁹en ol detlot enimul en bard bin kamat atsaid brom det bout du. Dubaladubala seimkain deibin ol kamat.

God bin pudum reinbo

²⁰Afta na wen Nowa en im femili bin ol kamat atsaid brom det bout, Nowa bin pailimap ston blanga meigim teibul blanga ofring, en imbin gajim sambala gudwan enimul en bard, en imbin kilim olabat, en imbin barnimap olabat ontop langa detlot ston blanga sei theingkyu langa YAWEI det trubala God.

²¹Wal wen detlot enimul en bard bin ol kukwan, YAWEI bin smelim olabat, en imbin tok,

God: “Im brabli gudwan dijan. Wal ai sabi pipul oldei jinggabat nogudbala ting brom olabat beibitaim. Bat ai kaan kilim dijan graun igin. Ai kaan draundim ola pipul en ola enimul igin seimwei laik aibin jis dum. ²²Nomo. Dijan kantri garra jidan longtaim, en ola bush daga garra oldei kipgon gro en bulurum detlot sisan, en ol detlot sisan garra oldei kipgon, en det san en det mun garra kipgon gidap en godan ebridei du.”

Storimen: ^{9:1}Wal God bin gudbinji blanga Nowa en im san olabat, en imbin dalim olabat,

God: “Yumob garra abum bigmob biginini, en olabat garra spredat ebriweya langa ebri kantri. ³En ola enimul en ola bard en ola fish garra oldei bradin blanga yumob, en yumob garra jidan bos blanga olabat.

³“Wal yumob sabi basdam aibin tok yumob lau dagadagat oni detlot daga weya gro langa tri. Bat brom tudei na yumob lau idimbat enijing weya wokaran laibala. Holot ai gibit langa yumob blanga daga. ⁴Oni wanbala ting deya. Bifo yumob idim bif brom eni enimul, yumob garra kadim det enimul en larrango im blad. Lagijat na yumob garra larrango det blad dumaji det blad na laif blanga det enimul. ^b

⁵“Najawan ting deya du. If eni pipul kilim najalot pipul ded, wal ai garra panishim olabat. En if enimul kilim pipul ded, wal ai garra panishim det enimul du. ⁶Aibin meigim ola pipul laik mi, en blanga tharran na if wan men kilim najawan men ded, wal najawan men garra kilim im ded du blanga det ting. ^c

⁷“Wal, Nowa, yumob garra abum bigismob biginini olabat, en dei garra spredat ebriweya langa ola kantri, en dei garra abum bigmob biginini du. ^{d 8-9}En ai garra meigim strongwan pramis langa yumob en langa ola biginini blanga yumob. ¹⁰En ai garra meigim dijan strongwan pramis langa ol detlot enimul en bard weya bin kamat brom det bout garram yumob du.

¹¹“Wal dijan na det strongwan pramis weya ai garra meigim langa yumob en langa ola enimul en ola najalot pipul. Ai kaan gaburumap ola kantri en ola pipul en ola enimul garram fladwoda

igin. Ai kaan meigim fladwoda gidap lagijat igin. ¹²En det reinbo garra jidan mak blanga main strongwan pramis weya aibin meigim langa yumob en langa ola najalot biginini blanga yumob en langa ola enimul. ¹³Det reinbo na garra jidan langa skai, en im jidan pruf blanga det strongwan pramis blanga yumob en blanga ola pipul langa ebri kantri en blanga ola enimul du. ¹⁴⁻¹⁵En wen rein buldan en det reinbo kamat, wal ai garra jinggabat main pramis weya aibin meigim langa ol yumob pipul. En ai kaan jandim fladwoda blanga draundim ebrijing igin. ¹⁶Ebritaim wen rein buldan en det reinbo kamat, ai garra luk det reinbo, en ai garra jinggabat det olagijawan strongwan pramis weya aibin meigim langa ol yumob pipul en langa ola enimul langa ebri kantri. ¹⁷Det reinbo na garra jidan mak blanga main pramis langa ola ebrijing weya jidan laibala langa ebri kantri.”

Storimen: Binij na.